

**সূরা - ৮৪**  
**খণ্ডবিখণ্ড করণ**  
 (আল-ইনশিকাক, :১)  
**মক্কায় অবতীর্ণ**

*আল্লাহর নাম নিয়ে, যিনি রহমান, রহীম।*

- ১ যখন আকাশ খণ্ডবিখণ্ড হবে,
- ২ আর তার প্রভুর প্রতি উৎকর্ণ হবে এবং কর্তব্যরত হবে—
- ৩ আর যখন পৃথিবীকে সমতল করা হবে,
- ৪ আর তার ভেতরে যা-কিছু রয়েছে তা নিক্ষেপ করবে এবং শূন্যগর্ভ হবে,
- ৫ ফলে তার প্রভুর প্রতি উৎকর্ণ হবে এবং কর্তব্যরত হবে।
- ৬ ওহে মানব! নিশ্চয় তোমার প্রভুর তরফে তোমাকে প্রচেষ্টা চালাতে হবে বিশেষ উদ্যমে, তাহলে তুমি তাঁর সাক্ষাৎ পাবে।
- ৭ সুতরাং তার ক্ষেত্রে যাকে তার নিবন্ধগ্রন্থ তার ডান হাতে দেওয়া হবে,
- ৮ তাকে তো তবে হিসেব চুকিয়ে দেওয়া হবে সহজ হিসেবনিকেশে;
- ৯ আর সে তার স্বজনদের কাছে ফিরে যাবে খুশি হয়ে।
- ১০ আর তার ক্ষেত্রে যাকে তার নিবন্ধগ্রন্থ তার পিঠের পশ্চাৎ দিকে দেওয়া হবে,
- ১১ সে তখনই ধ্বংসের জন্য আর্তনাদ করবে,
- ১২ আর জ্বলন্ত আগুনে প্রবেশ করবে।
- ১৩ নিঃসন্দেহ সে তার স্বজনদের মধ্যে ফুর্তিতে ছিল।
- ১৪ নিঃসন্দেহ সে ভেবেছিল যে সে কখনো ফিরে আসবে না।
- ১৫ না, নিঃসন্দেহ তার প্রভু বরাবর তার প্রতি দৃষ্টিদাতা।
- ১৬ কিন্তু না, আমি সাক্ষী করছি সূর্যাস্তের রক্তিমভাভ,
- ১৭ আর রাত্রিকে ও যা-কিছু তা তাড়িয়ে নেয়,
- ১৮ আর চন্দ্রকে যখন সে পূর্ণাঙ্গতা পায়,
- ১৯ যেন তোমরা এক স্তর থেকে অন্য স্তরে আরোহণ করতে পারো।
- ২০ সুতরাং তাদের কী হয়েছে যে তারা ঈমান আনছে না,
- ২১ আর যখন তাদের নিকট কুরআন পাঠ করা হয় তখন তারা সিজ্দা করে না?
- ২২ পরন্তু যারা অবিশ্বাস করে তারা মিথ্যারোপ করে,

২৩ অথচ আল্লাহ্ ভালো জানেন যা তারা লুকোচ্ছে।

২৪ অতএব তাদের সুসংবাদ দাও মর্মস্তুদ শাস্তির,

২৫ তারা ব্যতীত যারা ঈমান এনেছে ও সৎকাজ করছে,— তাদের জন্য রয়েছে এক নিরবচ্ছিন্ন প্রতিদান।